

2 TESALONICENSES

Yi Mimetz Necy Huidi San Pablo Yajniguejx Je Mibijcpidijc Jim Tesalónica

1 Hich Pablo miid Silvano etz Timoteo cham nguexyich jada necy ma je migügtijc huidibi ajcxy jim Tesalónica yajpatp, etz yajpatcixy ma iich ajt nDios Teedy etz ajt nHuindzin Jesucristo. ²Huen iich ajt nDios Teedy etz iich ajt nHuindzin Jesucristo may'ajt oy'ajt tunipy miid miich ajcxy etz xyajjotcugüygixip.

**Dios tiydunipy yi pocyjäydijc ajcxy
co anajty Cristo ymiñ jadug'oc**

³Migügtijc ajcxy, njatytimyajnaxypich jabom jabom jäygidaacin ma Dios miid miich ajcxy ycixpi. E jadu'n copicy nyajnaxyich jäygidaacin ma Dios, com miich ajcxy mibijcpy Jesucristo nigi jabom jabom, etz nañ nigi jabom jabom naychócgigixy nayjihüfiygixy nidüg nidüg. ⁴Com miich ajcxy ooy nuucxy meecxy m'ijtcixy ma yi tzaachypi etz ayo'n huidibi ajcxy mminajxyp myajnaxyp, e nañ ooy mmijpidaaccixy Jesucristo, paady ycixpi ngapxpaadyich miich ajcxy ma yi migügtijc

huidibi mijpidaacp Dios majaty tüg tüg cajp. ⁵Miich mmibijcin etz mmecxtujcin yi' je' iixpejtíp co Dios ytuädgyity miid ajcxy ytiyduunin, e xycöbijccixy co jëbi mdigüygixipy ma yi y'ane'mdac miid mmibijcin ycixpi. Miid jada ycixpi miich ajcxy mminajxcixy myajnajxcixy tzaachypi ayo'n.

⁶Miid co Dios ytuädgity, yi' tzaachytunamb yi jäy ajcxy huidibi miich ajcxy xy'ixhuidijtp xypahuidijtp. ⁷E nañ yi' ajcxy xymöhuipy jotcuje'ajtin tim jadu'n nej xymöhuäängixyich jotcuje'ajtin je huin'it xii co anajty ajt nHuindzin Jesucristo ñayguexigyii co anajty miiñ ya naaxhuiñ jadüg'oc choon anajty tzajpjoty. Nañ je ángeles ajcxy mic'ajt miidpi miinaamb quipxyi miid Jesucristo. Miinaamb Jesús miid ane'min cötujcin e yajtigoydähua'ñ pocyjäydijc, tim jadu'n nej tüg mijjin yajhuindigoydäy huen ytiijity. ⁸Jesucristo chaachytunamyb je mayjäy ajcxy huidibi ca'p cöbicy Dios, etz huidibi ca' mijpidägy ajt nHuindzin Jesucristo y'ayuc ytiy'ajt

oybi. ⁹Yi jäy ajcxy huidibi miich ajcxy xy'ixhuidijtp xypahuidijtp, Dios yi' tzaachytunaanip ajcxy y'alma huinixii huinitiempo. Dios ypidägaanip yi' ajcxy y'alma jiguëgy ma ni caminaxii ajcxy ijxcixyp je nHuindzin Jesucristo etz yi' y'oy'ajtin etz ymic'ajtin.

¹⁰Jadu'n yjadipy je huin'it xii huin'it tiempo co anajty ajt nHuindzin Jesús miin ya naaxhuiñ, Jesús je mibijcpidijc yajmij'adañ etz huindzigihuañ, e nañ jadu'n miich ajcxy myajmij'adipy etz mhuindzigihuipy miid co anajty y'ayuc ajcxy ti mmibijcci, je ayuc huidibi ti ngapxhuäcxyich ma miich ajcxy.

¹¹Paady ycixpi jabom jabom Dios nmibijctzooyich miid miich ajcxy ycixpi, jaydëbi tudägy ajcxy mdzinähuipy, e Dios huidibi ti xyhuin'ijxcixy yjäygidägyipy yi' miich ajcxy mdzinaayin. Nañ jadu'n Dios nmibijctzoogixy miid jada ycixpi co yi' cuydunipy huidibi miich ajcxy mbijctzooyb m'amidooyb miid oyjot oyhuinmañ. E nañ ycuydunipy yi' huidibi miich ajcxy mdumyb miid mmibijcin. ¹²Com Dios jadu'n tunamb ma miich ajcxy mjot mhuinmañ, paady ycixpi ajt nHuindzin Jesucristo yxii capxpaady y'idipy ma miich ajcxy mdzinaayin etz nañ jadu'n miich ajcxy capxpaady m'idipy ma Jesucristo. Jadu'n yjadipy com iich ajt nDios etz ajt nHuindzin Jesucristo may'ajt oy'ajt tuñ ma miich ajcxy.

Je jibic jäy huidibi huin'iimb mayjäy

2 ¹⁻²Migügtijc ajcxy, cham nyajmiidmiydaaccixy je xii

je tiempo co anajty ajt nHuindzin Jesucristo huimbidaani jadüg'oc ya naaxhuiñ, etz naybadaanim miid yi'. Nminucxtaapcyich miich ajcxy, ca' mhuinma'ñytigoogixy co pinjaty yminañ co Jesucristo ti yhuimbity. Ca' mmibijccixy, ca' jada ayuc yjanchity. Ca' mdungixy cuendi yi jäy ajcxy y'ayuc huidibi minamb co tüg espíritu ti yajnejhuiygixy co yjadu'nity, o co muum a'ijxnaxy amidoonaxy capxy ayuc, o co muum ijxpizimiy jada ayuc ma tüg necy huidibi ajcxy ytijpy co iich nnecy'adyii. ³Ca' myajhuin'ingix janch ni nej. Jayijp ca'ni anajty je xii je tiempo yhuaad'atyñi ma anajty Jesucristo ymiinañ jadüg'oc ya naaxhuiñ, mayjäy ajcxy midziptzonañ Dios tiydudägy co ñayguëxigiiyb tüg jibic jäy mic jäy huidibi Dios yajcödigooyamy tücci'yi. ⁴Jada jibic jäy ymidziptzonamyb tüg'óciy tijaty huidibi jäy Dios'ajtpy, e nañ ymidziptzonamyb huidibi jëbi yaj'ojadaty. E nañ yi' naybidägiib amij agix jadu'n nejhuüy yjacmijity ca'ydi Dios. E nañ yi' ypidägamb y'ane'mdac ma Dios ytijc, e naybidägaanip nejhuüy Diosity.

⁵¿Nej ca' mjäymejtzcixy co jadu'n nimiydacyich tüg'óciy jada tiy'ajt jayhuin je taab anajty n'ityich ma miich ajcxy? ⁶Jadachambi miich ajcxy mnejhuiyb pin yajhuäcxijp jada mic jäy jada jibic jäy, jigix ca'ydi ñayguëxigyii jayijpni ma ca'ni tiempo yhuaad'atyñi mina Dios a'ixihuip co ymiinipy. ⁷Je mic jäy je jibic jäy cham ñi'ixiiyb ameech je jibicpi huidibi ytunamyb, jëyi ytigoy'ityñi mina

je tü'aa y'ahuächyii, je huidibi yajhuäcxijip. ⁸Co anajty je jibic jäy ytü'aa y'ahuäch, chi ajt nHuindzin Jesús yajcödigoyipy miid tüg puxujin. Jesús yajcödigoyipy je jibic jäy miid yi' y'oy'ajtin etz ymij'ajtin co anajty yhuimbity ya naaxhuiñ. ⁹Je jibic jäy, yi' je' ymiid je mujcu' yhuinma'ñ etz ymic'ajt, e ytunamyb mijhuinma'ñ etz ijxpejt huidibi anijip. ¹⁰Je jibic jäy ytunamyb tüg'óciy tijaty jibic-huinma'ñ jigix jëbi huin'iinip yi' jäy ajcxy huidibi y'alma tigoyipy, miid co ca' ajcxy cöbijccixy, e nañ ca' tzojccixy Dios y'ayuc ytiy'ajt huidi miid jëbi y'alma ñidzoocixy. ¹¹⁻¹²E je' ycixpi co ca' ajcxy cöbiga'ñ Dios ytiy'ajt, paady Dios y'ixmadzáanigixy huen yajhuin'iingixy, huen mibijccixy je mujcu' y'aniñ, e miid jada ycixpi jëbi Dios yajtigooyi yi' ajcxy y'alma nidüg'óciy huidibi ca' mibiga'ñ Dios ytiy'ajt. Jacjotcujc ajcxy co jibic-huinma'ñ tungixy.

Je jäy ajcxy tiibi Dios yhuin'ixyii jigix ypocynñihuädziy

¹³Migügtijc ajcxy huidibi ajt nHuindzin Jesucristo ooy tzocy jihuñ, jabom jabom nyajnaxyich jäygidaacin ma Dios miid miich ajcxy ycixpi, miid co Dios ti xyhuin'ijxcixy oga'n'aty, jigix jëbi m'alma ñidzoocixy miid Dios yjihui'ñ ymic'ajt, etz nañ miid Dios y'ayuc ytiy'ajt huidibi ti mmibijccixy. Je Dios yjihui'ñ ymic'ajt xyajhuaatzip ajcxy mjibicjot mjibic-huinma'ñ. ¹⁴Paady ycixpi Dios ti xyhuin'ijxcixy, e nañ xyajmibijccixy miid yi' y'ayuc ytiy'ajt huidibi iich

ajcxy ngapxhuäcxyp, jigix jëbi mbáatcixipy oy'ajtin ma iich ajt nHuindzin Jesucristo.

¹⁵Paady migügtijc ajcxy, mibijccix tiydudägy, ca' m'ixtigihuäccixy, e ca' mjäydigooygixy je tiy'ajt huidibi iich ajcxy ti ngapxhuäcxy ma miich ajcxy, etz jadu'n nej ti nnimaaygixy necyjoty. ¹⁶⁻¹⁷Huen iich ajt nHuindzin Jesucristo ci'm etz ajt nDios Teedy may'ajt oy'ajt tunipy miid miich ajcxy, e xyajjotmicpñijccixipy etz xyajmibijccixipy tiydudägy, jigix oybi ayuc mgäpxcixipy etz mdunipy ajcxy tüg'óciy oybi huinma'ñ. Iich ajt nDios Teedy etz iich ajt nHuindzin Jesucristo xychojcin xyjihuiyim, e ti xymooyim jotcujc'ajtin huinixiibi, e nañ ti tuñ may'ajt oy'ajt miid iich ajt ycixpi, jaydëbi njjip'ijxim oy'ajtin jiiby tzajpjoty.

Mibijctzoogix Dios miid iich ajcxy ycixpi

3 Jadügnax, migügtijc ajcxy, tungix may'ajt mibijctzoogix Dios miid iich ajcxy ycixpi, jigix jëbi ngapxhuäcxibich huinmic jotmic Jesús y'ayuc ytiy'ajt huingnaax huinggajp. E nañ mibijctzoogix Dios jëbi yi' jäy ajcxy mijpidägy Jesús y'ayuc ytiy'ajt oybi, tim jadu'n nej miich ajcxy ti mmijpidaaccixy. ²Nañ mibijctzoogix Dios miid iich ajcxy ycixpi, jigix iich ajcxy Dios xyñihua'nipy xycohua'nipy ma yi' jäy ajcxy huidibi jibic-huinma'ñ ymiid, huidibi jibic iich ajcxy xytunamb, com mayjäy ca' mijpidägy Jesús y'ayuc ytiy'ajt. ³Iich ajt nHuindzin Jesucristo tudägy yi', e xypubedip xypudigihuip ajcxy jigix miich ajcxy ca' mjetmetzcñhuipy ma yi' mmibijcin, e nañ xypubedip

ajcxy, jigix ca' xymimadáaccixipy je jibicjāy huidibi Dios ca' capxymidoy. ⁴Ich ajt nHuindzin Jesús jotcujc'ajtin ti xymóoygixyich miid miich ajcxy ycixpi. Nmibijcipyich co miich ajcxy mguydumyib je Dios y'ayuc ytiy'ajt huidibi nyaj'ixpijccixy etz mjaccuydunaamyb ajcxy. ⁵Com ca' iich njaty nej njijpcogapxihuibich, chi nguejxyich cogapxy, nnejhuíhuañich nej anajty ajcxy myajpatcixy ma yi mibijcin, tzigiib iich anajty co nicxy mujcu' xypidaaccixy jibictuum, chi iich anajty ajcxy ndung ti ñaadigi'aty.

**Ooy ycopicyity co nduunim
ma ajt ndung**

⁶Migügtijc ajcxy, miid ajt nHuindzin Jesús yxi etz ymic'ajt jada ane'min ajcxy nyajniibijcipy, co copicy ajcxy m'ixmadzipy yi mmigüg huidibi ca' ytunañ ma yci'mdung, etz huidibi ca' cuyduñ Dios ytiy'ajt jadu'n nej iich tiy'ajt ti nyecy. ⁷Miich ajcxy mnejhuíyib jadu'n nej iich ti ndzinäyich ti njugy'atyich co ti n'ityich ma miich ajcxy. E jēbi tiy'ajt ajcxy mbigipy ma iich ndzinaayin nej jēbi miich ajcxy mdzinaaygixy. Co anajty iich njimity ma miich ajcxy, ca' iich n'ixmajch ngi'mdung. ⁸Tüg'óciy iich ajcxy ngaayin n'uucin ngojuuyich. Nduñ n'ayooyich anajty xiim tzuum, co anajty ca' n'adzibañich ni tüg. ⁹Dios ti xymöyich mic'ajt ane'min co ixipy ajcxy mbubejtin ti nbijctzoohui o ti nbijctzoohui ixipy ajcxy mgaayin m'uucin, per ca' iich ajcxy jadu'n ti ndúngixyich, jigix iixpejt ajcxy mbigipy ma iich ajcxy. ¹⁰Com co anajty n'ityich ma miich ajcxy

jada cōtujcin ajcxy nyajniibijc co pinjaty ca' ytunañ, ca' ajcxy myajcayipy myaj'ügipy. ¹¹Jadu'n iich ti nnejhuíy co nijējity miich ajcxy ca' mdunaangixy ngi'mdung, jēyi myöygixy mnajxcixy jāyjiin jāydijc. ¹²Yi jadu'mbi jāy ajcxy nyajniibijcipyich miid iich ajt nHuindzin Jesús yxi co huen tungixy jabom jabom ma yci'mdung, ca' huaad pin adzijpcix anajxcix jigix jēbi paadip ajcxy ycaayin y'uucin.

¹³Migügtijc ajcxy, oybi jatyim tungixy jabom jabom, ca' mjotmetzcíygixipy. ¹⁴Pen nidügti ma miich ajcxy ca' tuñ cuendi jada ayuc huidibi ajcxy nyajnijayiyb, ijxcix pin je', e chi ca' mjactúngixip cuendi, e ni ca' miid myöymujc mnaxmújcixipy, jigix chöydunipy. ¹⁵Ca' ajcxy huaad midzip'ajtcixy yi jāy ajcxy huidibi ca' yajxon cuyduñ Dios ytiy'ajt. Hue' janchtiy mgapxhuijcx oy'amy jadu'n nej tüg mibijcpi.

Capxpooxin huidibi cijxnip je necy

¹⁶Huen iich ajt nHuindzin Jesucristo huidibi jotcujc'ajtin yejcp, ci'm xyajjotcugíygixipy jabom jabom oytim mīnaaxijity oytim yma'ámyity. Huen je Huindzin Dios xypubejtcixy xypudigiigixy.

¹⁷Ich, Pablo, jada capxpooxin ci'm njaayich. Jadu'n nfirmajiyich tüg'óciy iich nnecy, e jadu'n miich ajcxy mnejhuíhuipy co iich jada necy'adyii. ¹⁸Huen iich ajt nHuindzin Jesucristo may'ajt oy'ajt tunipy miid tüg'óciy miich ajcxy. Jadu'n jada. Amén.